

Cun cor e cumpetenzza – menadra dalla tgira ed accumpignament sco niev pensum



Miu num ei **Alexandra Quinter**, jeu sun da Glion e selegrel da surprender el futur **il tgamun dalla tgira ed accumignament dalla Casa s. Martin**. Quella sfida captivonta surpegliel jeu naven digl'emprem d'avrel 2025, quei cun grond plascher ed engaschi.

Suenter mia formaziun sco tgirunza diplomada HF hai jeu absolviu ina formaziun supplementara sco tgirunza d'operaziun. Quella capacita ha possibilitau a mi d'aprofundar mia savida e da vegnir activa en in camp specialisau. Silsuenter sun jeu stada plirs onns activa el

spital regional a Glion sco specialista da tgira diplomada ella sala d'operaziun. Quei temps ei staus per mei ordvart custeivels damai che jeu vai saviu sviluppar ina profunda capientscha per process medicinalis e per la muntada dalla lavur da squadra en situaziuns pretensiusas.

Cul temps ei miu giavisch semadiraus da s'engaschar dapli per senioras e seniors, quei che ha motivau mei da midar la finala tier la Spitex Foppa. Leu vai jeu sco menadra da squadra buca mo surpriu responsabladad da menar, mobein era stada activa directamein egl accumpignament da nossas clientas e nos clients. Plinavon sun jeu stada responsabla per la garanzia dalla qualita, in pensum che stat a cor a mi.

Per rinforzar mias cumpetenzas da menar ed organisar vai jeu absolviu ina scolaziun da menar el BGS a Cuera. Quei perfecziunament possibilitescha a mi da sepreparar optimalmein per incumbensas da menar ed el medem temps d'aprofundar mias habilitads ella collaboraziun cun squadras sco era ella planisaziun strategica.

La midada en Casa s. Martin sco menadra dalla tgira ed accumpignament munta per mei in ulteriur tiern decisiv en mia carriera professiunala. Miu giavisch ei da crear la Casa s. Martin sco liug nua ch'ins viva ni lavura bugen e nua ch'ins passenta cun plascher temps sco visitader. In liug nua ch'ins sesenta bein perquei ch'igl accumpignament ei buca mo professiunals mobein era cordials ed individuals.

Jeu selegrel da gidar a formar la Casa s. Martin activamein, d'emprender cheu d'enconuscher ils carstgauns e da crear comunablamein cun las collaboraturas e cussadents in ambient da segirtad, dignitad e qualita da viver.

Cordials salids

Alexandra Quinter